

LI CREKION

d'après Florian.

On pôve djon.ne di crèkion qu'aveûve one pitite mine,
Dau fin fond do wazon cwârneûve on papiyon :
« I covole d'one à l'ôte come on minâbe qui chine
Pa-t't-avau totes lès fleûrs po scroter leû sint-bon !
Bleuwausse fleûr di galant, rodje pawè, mârguèrite,
Chiteroule, balbûre, tot fait farène au bon molin. »
Li crèkion si d'mande si c'è-st-insi qu'on-z-èrite
Dèl pèkléye di coleûrs qu'èbèlit nosse vaurin.
C'èst qu'i bat d'on côp d'éle, sins taurdjî, come po s' foute,
Moussî come è s' maujone, èvôye sins dire merci ,
Come s'i sèreut pressé, nin l' tims d' trauyener en route ;
Ti direûves on marlou qui tot sèreûve da li.
« Qué maleûr », dijeut-i, « di s' trover si minâbe !
Li cia qu'a fait lès paurts n'a nin r'wêti si près :
Midone avou ç'tici, mins avou m'-n-ome, arâbe,
Come on vraî alcotî qui n'a ni fwè ni lwès !
En ratindant, nos-ôtes, pôves crèkions sins visadjes
Qu'on-z-a mètu su l' tête mins qui n' sont bons à rin,
Nos-èstans condânés à on drole di vikadje ;
Gn-a pus qu'one sôte à fé, c'èst stron.ner à s' loyin. »
Il èsteûve à tûzer qu'il arive tote one binde
Di bauchèles èt d' gamins ènondés, èfouffis ;
C'è-st-adon qu'i comprind qu'il aureut twârt di s' plinde :
Mokwès, tchapias, poûjètes flayenut po l'apicî.
C'è-st-après l' papiyon èt sès bèlès coleûrs
Qu'i vorenut èt chorer, i l' volenut atraper !
Onk què lî stind sès-éles, l'ôte què l' sère conte si keûr :
Ça n'a nin compté quate qu'il èsteut cochuré.
« Co d' chance », di-st-i l' crèkion, « qu'il ont œuru sins m' veûy !
Ça costéye mwints côps tchèr di passer po l' pus bia . »
Tot l' monde a l' drwèt d' tchwèsi : s' vanter èt fé di s' gueûye,
Ou bin s' catchî èt s' taîre, waîtî d' fé por on mia.

Albert Delvaux

Crèkion : grillon

Cwârner : regarder en coin

Fleûr di galant : bluet

Pawè : coquelicot

Chiteroule : mercuriale annuelle

Balbûre : bouton d'or

Marlou : souteneur

Midone : généreux

Arâbe : très avare